

四庫全書

集部

欽定四庫全書

集部

碧梧玩芳集卷三

一至

詳校官庶吉士臣張溥

主事臣呂雲棟覆勘

謄錄監生臣程廷璋

謄錄監生臣汪麟

欽定四庫全書

集部四

提要

碧梧玩芳集二十四卷 別集類三 宋

臣等謹案碧梧玩芳集二十四卷宋馬廷鸞撰廷鸞字翔仲樂平人淳祐七年進士歷官右丞相兼樞密使事迹具宋史本傳史稱其罷相歸後又十七年而卒考廷鸞之罷在度宗咸淳八年壬申其歿當在元世祖至元二

十六年己丑令集中老學道院記稱著雍困  
敦之歲余年六十有七則作是文時去其病  
歿已不遠是集為其子端臨所編其曰碧梧  
玩芳者廷鸞家有碧梧精舍晚年又自號玩  
芳病叟因以為名也自明以來外間絕無傳  
本惟永樂大典所收頗存梗概大抵駢體最  
工理宗末年又居兩制朝廷大著作多出其  
手其他詩文亦皆典瞻秀潤盎然有卷軸之

味端臨承籍世業撰為文獻通考至今為藝  
林寶重即廷鸞所學可知也其集宋史不著  
錄原編卷數已不可考謹以今所存者裒輯  
排比分為二十三卷廷鸞又嘗倣呂祖謙大  
事記之例作讀史旬編以十年為一旬起帝  
堯元載甲辰迄周顯德七年庚申為三十八  
帙今全書雖佚而緒論尚散見永樂大典併  
裒為一卷附于文後共為二十四卷宋史稱

廷鷺所著又有六經集傳語孟會編楚辭補  
記洙泗裔編讀莊筆記諸書令並不傳又稱  
其名試館職時即以疆君德重相權收直臣  
防近習為對為將作少監時論貢舉三事又  
言宜蠲除被災州縣租賦為起居舍人時言  
太史當謹書災異又言翕受敷施以壯人才  
之精神虛心容納以植人言之骨幹念邦本  
而以公滅私嚴邊備而思患預防同知樞密

院時言培命脉植根本崇寬大行忠厚又言  
恢大度以優容虛聖心而延佇推內恕以假  
借忍難行而聽納則情無不達理無不盡云  
云其文今皆不見于集中或奏疏別為一編  
故此集皆不見收歟乾隆四十六年九月恭  
校上

總纂官臣紀昀臣陸錫熊臣孫士毅

總校官臣陸費墀





欽定四庫全書

碧梧玩芳集卷一

宋 馬廷鸞 撰

奏狀

兼右諭德辭免奏狀

自天有命躋地無容臣竊以聖主詒謀莫重元良之本  
儒臣勸講尤嚴贊諭之僚孰謂謏材遽塵華選伏念臣  
蠢愚下士迂狃諸生久汚班行已寸長之蔑取驟登儲  
采於三善以何裨忽蒙黼黻之簡知躡預青宮之諷導

載稽唐制見謂優秩清班允若聖時率用名流勝士臣  
既無素望又匪舊人特被選掄殊駭觀聽懼深維谷誼  
合循牆伏望聖慈俯鑒愚悃收回命渥免陪春誦之聯  
別選才良上輔日新之學庶安愚分仰荅隆恩所有恩  
命臣未敢祇受

除國子監司業辭免奏狀

自天有命躋地無容伏念臣才不如人學未聞道僥逾  
里選靡由庠序以進身綴緝時文莫識聖賢之用意有

若儒官之選允由士類所推況朝廷天寬地大之時正  
學校魚躍鳶飛之日欲淑佩襟之儀表是資領袖之端  
良有如樂正之官是曰司成之副陽城可謂有道乃見  
服於學徒高閎豈非儒臣或貽譏於公議仰尋先哲內  
懼非才倘猶昧於循牆將有叱而避席輒殫微悃仰冒  
皇明恭望聖慈俯照忱懇收回誤渥改畀時流大學得  
名儒使羞其行師氏教國子永觀厥成所有恩命臣未  
敢祇受

除兼翰林權直辭免奏狀

恩擢超踰愚衷震惕切以明時掌制聿嚴內命之司聖  
主掄材尤遴外庭之選若稽史牒謹簡詞臣官清儉直  
則備自有唐資淺攝承則昉由我宋上規開寶文郁乎  
哉近接淳熙道粲然矣聿求宗匠俾典禁林然而望實  
未孚神祖尚難於蘇軾官名初建孝皇始命於端詩伏  
念臣猥以諸生起於下國識窮短絆無能汲古學之淵  
源思澁寒筭不足協斯文之律呂以場屋孱儒之靡列

縉紳華選之先從太子游已懼罔功於諭導見王者志  
若為有補於討論矧耆儒宿老甫爾請歸乃新學小生  
居然代匱繼承人乏豈及臣愚恭望聖慈俯憐卑悃收  
回誤渥改畀名流庶幾詞章足以恢人文詔令足以宣  
皇澤坦然帝制復還二典之醇大哉王言俾達萬民之  
悅庶安愚分用竭忱辭

除權直學士院辭免奏狀

璧水充員無補明時之造士蓬山列事况遭聖代之右

丈仍叨疊組之榮重誤疏綸之寵非天曷戴無地自容  
伏念臣猥以孤生起於下國繩樞甕牖曾無藻色之工  
金馬石渠早愧芸香之選頃從農畝召復舊班學淺資  
輕屢丐一麾於江海年除歲擢浸成三入於瀛洲更以  
常才猥叅少令豈直今世人文不輕得此政使先朝宿  
老尚或難之惟昔淳熙有臣必大嘗貳職於中秘兼典  
制於內庭彼其獨擅儒宗矧又奮由詞學然觀避疏猶  
云才技之無堪暨覩訓詞凜然名實之有戒是知華選

難畀庸流臣詞華敢企於前儒愚慙不逮於世事倘冒殊恩而亟拜滋誤睿主之選掄俯庸披露於血忱仰乞收回於汗渙庶安舊次免累聖知所有上件恩命臣未敢祇受

元日除起居舍人辭免奏狀

渙揚宸渥震惕愚衷切以柱下清官朝中盛選致君堯舜執簡操筆皆聖人之徒事為春秋廣記備言斯國史之體諒非長德曷畀庸流臣才望至卑資歷尤淺復來

七日中祕首塵泰內三陽右螭尾進歲月無幾旦暮輒  
遷率由典常最稱遴選諸所記注尚多攝承若徑冒於  
真除重貽譏於躡進而況謀猷內告缺然慙直方之姿  
書法後觀無以傳深微之意皆於聖代為有慙夫豈愚  
分之所安與其拾級以升徒有疾顛之懼孰若循牆而  
避庶幾初服之修恭望睿慈不嫌改命收回誤寵別畀  
時才式嚴君舉之書上贊帝王之治

除中書舍人辭免奏狀



九重超擢孤士震驚伏念臣素拙文辭尤疎學術終年  
鰲禁曾無起草之工一日薇垣驟玷為真之寵此何官  
也臣敢兼之自周典之掌贊書是資華國至唐人之有  
還詔亦謂回天詞章蹇淺則主德無以宣明風力銷沈  
則公論難乎滿愜至如真授尤號優遷臣修不試文而  
除臣軾自記言而拜彼皆何等材分孰能與之躋攀厥  
今聖主有從諫轉圜之明諸臣多會文切理之彥取之  
下品恐不中書倘少昧於控辭是自貽於顛踣仰祈睿

察特反誤恩不嫌銷印之難擇人改界庶免斷窻之醜  
為時起羞

除中書舍人再辭免奏狀

控辭誤渥首虞掌制之非工尚閔俞音更懼濫官之速  
戾重殫庸陋頻瀆聖明伏念臣山林之癯本無薄技歲  
月之近徧歷華途晉貳蓬山俄接螭坳之步隨羣鴛路  
躡追豹尾之班在於典常已越夷等愚臣玩日曾莫效  
于涓埃聖主如天纔一吐其狂瞽若更超擢允極僥踰

士有常心然後禮義庶恥之與立官既易得正緣公卿  
侍從之可圖伏望皇帝陛下察其愚衷賜之聖斷收回  
恩命改畀時名使無處衆人之所爭而多取天下之公  
器庶安愚分永戴皇明

隨龍轉四官辭免奏狀

鶴禁執經漫塵攀附龍飛賜秩特愧超踰躡等既深循  
牆敢後伏念臣素持樸學恭際盛時三年獲侍於承華  
一得何裨於新益性能天授本由聖學之高明日就月

將安取愚臣之輔翼然且每盈歲輒被宸綸茲繼照  
於離明復誕揚於渙汗不遺故舊丕昭伐木之仁若假  
器名徒重繁纓之錫恭望皇帝陛下俯憐卑悃亟寢誤  
恩傳不勤師不煩昔已大成於后德官不諂士不濫今  
宜益肅於朝綱

除權禮部尚書辭免奏狀

自天有命無地措躬切以文昌從列之最高儀曹邦典  
之尤重詎謂孤蹤之宜去乃逢顯擢以攝承伏念臣被

遇先皇僥踰近侍徒以文辭之薄技適遭明主之殊知  
武帝賜淮南王祇愧平時之視草成王命召太保驚聞  
一旦之顧言萬宇摧心三靈變色恭際大明之出收悲  
以欣幸逢小莖之求舉直錯枉此羣材連茹之日實寸  
草歸根之時惟先帝蛻衣冠而賓空汗漫之遊遠矣若  
微臣執筆墨而事主進退之誼何如莫獲徇身正宜屏  
迹初非貪戀尚希進於明時姑示從容恐重傷于聖抱  
胡為越躡驟有躋攀欲望皇帝陛下洞達聖聰俯矜愚

金匱要略卷一  
惻於此時而峻陟瀝血以辭若異日之甄陶捐軀而報  
所有上件恩命臣未敢祇受

魚侍讀辭免奏狀

自天有命踏地無容伏念臣學殖空荒見聞單淺比充  
員於新益獲侍龍潛茂有補於就將漫隨鴻翼茲蓋恭  
遇皇帝陛下體乾剛健位履正中大明方升正懋緝熙  
之學小莛求助尤資訪問之功嗣德在初知人則哲欲  
講明於禮履宜簡拔於髦英非道不陳必有孟軻之素

學唯材是與難私秦府之舊僚欲望皇帝陛下深軫聖  
慈俯矜愚悃特收成命宜亟畀於名流俾闡大猷以上  
培於新德所有上件恩命臣未敢祇受

除端明殿學士簽書樞密院事辭免奏狀

臣伏蒙聖恩除臣端明殿學士簽書樞密院事特降中  
使宣押臣赴院治事臣聞命震驚罔知所措伏念臣一  
介孤生再逢明主禮闈擢第濫居衆選之上游禁苑試  
言首辱先皇之殊遇浮沈三館邂逅一鳴虎豹守九關

早已困下窺之啄害鳳凰翔千仞詎容希羣羽之雖喈  
天地重開班行再穆首還冊府俄掾宰庭荏苒六年遭  
逢千載靡知止足遍歷清華瞻帝鄉之雲愴陳末命升  
暘谷之日竊仰重明臣塵筆橐而學識不足以裨補新  
朝臣掌絲綸而文字不足以發揚大冊徒以舊陪儲禁  
從而攝長春官既極僬踰念求閒散敢圖睿眷擢蓮樞  
臣奏薄技于從官尚難自勉贊本兵於宥府胡可冒居  
矧未嘗一日而歷州縣之勞乃遽繇累遷而接廟堂之



武先朝名臣曾不一二後進晚輩敢冀萬分倘昧懇辭  
立虞顛踣伏望皇帝陛下收回成命改畀英髦俾還獻  
納之舊班祈遂退休之素志庶安愚分不辱聖知所有  
上件恩命臣未敢祇受

表

中書舍人謝上表

載筆右坳記事已叨于假寵演綸西掖代言忽冒于真  
除對金蓮炬以增慚佩紫荷囊而不稱非天曷戴無地

自容

中謝

竊以修飾討論贊書體重溫醇深潤典制才

難於昭明堂迪惟今日宜有高文大冊以揚偉績宏休  
巍巍乎蕩蕩乎惟堯有成功也渾渾爾灝灝爾下周其  
必誰乎如臣者吹本濫竽汲惟短絆結綬寢踰於四載  
濫巾何意于九遷辭宰掾佐儒官蛻簿書之凡質黜禁  
林貳祕府陪丈士之英游官僚徒採如春華柱史蔑聞  
于辰告詎期霄獎更玷親除六學士三舍人何敢望一  
時之名勝四三王六五帝若為兼兩制之發揮難酬雨

露之恩交積淵冰之懼茲蓋伏遇皇帝陛下聖神天造  
剛健日新河西頌天子之明能見萬里山東感武夫之  
聽迄濟中興良由號令罔有不臧匪獨文章煥焉可述  
斧藻益彰于聖作網羅顧及于臣愚命服斯皇恩綸有  
煒臣敢不恪共官次感誦君仁敕經鳳閣鸞臺獻替無  
裨于大義名列雞翹豹尾論思合罄于小忠

謝御賜詩表

臣有常憲遞直玉堂帝庸作歌驟頒寶畫詞林盛事儒

藻榮觀

中謝

切以內禁申嚴諸儒僂直八磚晚籩未許

倦游三伏早歸纔容夙退率沿唐世以暨本朝惟昭代之右文於儒臣而假寵凝酥入詠昉常錫於宸章前席興思億荷蒙於聖製至如易簡尤遇熙陵彼皆傑然之才宜被煥乎之寵如臣者汲同短綆吹類寒芋自慚操上水之舟每念草歸田之賦比由夜直首沐天恩郢鵲初設於上方閩荔仍頒於遠物事光前代眷迴異時未踰浹日之期重拜非煙之瑞身兼兩制濫陪從雍之班

運際千齡驟捧橫汾之作恩由上出感自中深茲蓋伏  
遇皇帝陛下睿藻日新皇猷天縱虞絃協奏上同帝舜  
之乃文漢筑漫歌俯陋高皇之未學奎畫龍鸞之眩晃  
天章河漢之昭回若稽淳化之初絕出中興之後聖謨  
有煒至德難名臣捧戴有榮襲藏惟謹寫之琬琰所宜  
續舊制於金坡傳之子孫常恐發神光於郅屋臣無任  
瞻天望聖激切屏營之至景定五年六月某日朝請大  
夫試中書舍人兼權直學士院兼同編修國史實錄院

同修撰兼太子庶子臣某表

進和御製詩表

恭惟皇帝陛下睿謨濬發聖藻彰施天縱又多能侈龍  
鸞之妙畫帝光飭萬物挾河漢之宸章比詞臣入直於  
金坡乃御製親頒於寶畫焜煌聖作黼黻儒流賜龍箋  
之題淳化初褒於易簡揭玉堂之榜紹興重錫於麟之  
茲興起於人丈亦對揚於祖武臣謬充鼇禁叨被龍光  
羞薄技之前陳持庸音而賡載大明委照燭火安敢以

呈輝迅霆發聲衆賴自為之息響退循荒斐彌積兢慚  
謹恭和成二首上瀆聖聰

除禮部侍郎謝上表

王制祿則贊書久塵內史帝咨能而典禮遽貳秩宗帶  
悸有容衣華已泰感深滋懼恩厚難任

中謝

竊以侍從

班穹禮官責重韓愈奏薄技自許文章叔孫召鄙儒不  
通時變况復愧漢唐之士若為事堯舜之君伏念臣一  
介孱孤千齡際遇甘泉宮玉堂殿承詔才慳水蒼佩進

賢冠章身德薄漫塵兩制初乏一長天章下飭於禁林  
寵過令狐之夜炬海潤無裨於儲寀譏同公幹之春華  
維鵜不濡瞻烏欲哺舍肉屢貽於頰谷歸耕獨戀於綿  
田重汙高紳荐干閒廩遲頒俞旨早被恩言孰謂知禮  
乎既慚綿蕞何以謂文也仍綰絲綸偃躬腰下之黃金  
覲面階前之紅藥榮名過渥竊器易盈茲蓋伏遇皇帝  
陛下任官惟賢知人則哲惟天明畏必惇典庸禮以代  
天工作民孚先必發號施令而達民說詎容駑蹇疊冒



寵光臣內揆所蒙長懷未報聖人為禮教式敷降典之  
邦彛明主可忠言敢愧進思之宸筆

進先皇御製宸翰表

臣某言臣先於景定五年六月同前學士牟子才恭被  
烈文仁武安孝皇帝賜臣等御書御製玉堂寓直詩臣  
等尋於學士院刊刻立石者伏以龍馭神游深抱烏號  
之痛鰲坡聖作空餘鳳翥之奇寫琬琰以甫成冒冕旒  
而登進稍紆睿鑒深動孝思

中謝

臣庸謏書生遭逢先

帝繩樞甕牖本非潤色之材金馬玉堂久玷清華之選  
頻對花磚而候影頗同蓮炬之分輝維一介臣曷當主  
眷與他學士皆拜雲章聖肆筆以成書帝作歌而賡載  
翠珉就刻欲刊懿典於金坡仙鼎告成頓隔威顏於玉  
座襲藏增感捧戴知榮茲蓋伏遇皇帝陛下景運當天  
重華協帝繼文之業用彰神藻之發揮見堯於牆允極  
聖情之追慕恭陳寶軸肅上紫宸供奉當時自負貞元  
之朝士傳誇盛事尚矜淳化之詞臣臣無任感天荷聖

激切屏營之至所有先帝御書御製詩一軸謹隨表上  
進以聞

同知樞密院事兼叅政謝上表

名節載馳促朝魏闕恩書狎被擢貳機庭恍驚詔綽之  
新榮躡進籌帷之故步仰瞻天咫尺俯切氷兢

中謝

伏以

國之大事在戎況闕兵本王任舊人共政實倚賢謨苟  
非其人不在此位伏念臣材慚庸瑣運際休明兩禁代  
言有感貞元之朝士六龍御極首登秦府之舊僚而臣

甕缶量盈栝櫟澤殄三年罹棘已誤太行之雲飛一旦  
塗芝又報長安之日近荷聖主記憐於中野徬徨之後  
感公朝拔擢於窮山寂寞之濱與之琴而使彈未忘切  
切招以旌而欲往寧獨遲遲已稽俟駕之誅更被出綸  
之寵昔叅宥命今副事樞藩臣勉諭於里閭貂使傳宣  
於畿輔玉階布武方趨紫殿以稱觴奎畫陟明復踐黃  
扉而預政股肱所寄踵項莫酬茲蓋恭遇皇帝陛下舜  
哲知人堯仁徧物元祐之開皇極既資彥博之壯猷慶

歷之對天章必擢仲淹之宿望英辟丕承於祖武孱儒  
曷繼於前修臣敢不仰戴洪休自鞭駑鈍集思廣益無  
能効智於廟謨同寅協恭惟知純意於國事

提舉官進上經武要略表

於昭皇武續唐雅之獻歌有赫神謨軼漢書之輯略吉  
涓穀旦肅上瑤編

中謝

伏以國家紫蓋黃旗上應東南

之運金城鐵壁外嚴西北之防徹桑常謹於綢繆汗竹  
不勝其紀載武有七德務保大以為先天生五材欲去

兵而不可恭惟皇帝陛下乾旋坤轉日照月臨登瀚海  
銘燕然蚤欲挽尚文之獎賦采薇歌杖杜永無忘經武  
之勤詰爾戎兵戒我師旅惟中興五世之業丕顯丕承  
自淳祐四禩以來且攻且守爪士持弓而禦塞元臣授  
鉞以臨邊北復襄樊南通交廣候望不撤乎四境籌帷  
每出於萬全馬飲江湖坐送佛狸之死兵傳風鶴遙驅  
草付之亡既侈伐功爰修武志混夷駢矣聿昭禦侮之  
良皇王烝哉丕播駿聲之烈視諸故府欽乃攸司裁為

百卷之奏篇必提其要載續九年之行事皆聚此書臣等莫補宏綱願規常德春秋無義戰於二三策以何稱帝王有要經斯十一征而無敵

謝除觀文殿大學士提舉臨安府洞霄宮表

相印上還愧股肱之已墮宸綸中出知體貌之未衰侯藩許避於鄉邦書殿仍兼於祠廩恩與天而同大感無地以寄言中謝伏念臣猥以諛儒獲逢休運旁招俊乂濫陪鴻翼之後塵利見大人親覩龍飛之盛際粵從初

政已躡近班千秋無閼閼功胡為取相公孫有狗馬病  
宜亟避賢惟其未嘗施橫草之勞是以久而負積薪之  
困公朝寬大假告頻數而并容明主矜存宣問稠重而  
不已而臣任踰其分福過於災不勝惟疾之憂終冀乞  
身而去疊干宸聽迄荷天從錫祕殿之穹班予便藩於  
本郡尚方薰茗以厚其寵御府金幣以華其歸終然徇  
偃僂之私展也賦支離之粟恭惟大造絕出常倫茲蓋  
恭遇皇帝陛下仁深善貸德本好生念其景迫崦嵫尚



憂盈滿憐其身填溝壑將遂宜休姑無意於榮名俾自  
儕於舊弼寵綏若此報稱謂何臣曷策枯羸仰酬高厚  
冢宰掌邦治既蔑效於涓埃華封祝聖人當力勤於香  
火

賀皇帝登寶位表

統接千歲王者無私明照四方大人有繼華夷胥悅宇  
宙一新中賀恭惟皇帝陛下神授英奇性鍾睿哲聖功  
養正期於傳不勤而師不煩帝位履中必也天助順而

人助信謳歌有屬歷數攸歸遵聖父之顧言敬保元子  
奉太皇之慈訓擁佑神孫稽春秋立嫡之文法大易體  
元之義一人有慶天下為公臣荷朝厚恩忝國舊輔河  
清海宴共欣聖作之辰山高日升快覩時平之象

欽定四庫全書

碧梧玩芳集卷二

宋 馬廷鸞 撰

詔

招諭雲南土官等詔

朕誕膺景命君臨萬邦聲教所通無間遠邇矚此西南之地實我祖宗之民叛賊死可伐敢冒刑章作為弗靖侵掠境土戕害生人憫其狂愚累加招諭本賊執迷負固罔有悛心爰命將而出師以恭行乎天討指其巢穴

取彼渠魁尚慮諸路旬寨土官軍民人等或受制於凶徒相搦搖而搆亂原其初志匪出同謀既處危疑遂懷反側庸申訓告俾亟來歸詔書到日除死可伐不赦外應有被死可伐脅從誑誤之人納款出降者並免本罪各安家業原有官者悉復其官能生擒死可伐及殺獲其首級者具以名聞優加賞賚陞擢其死可伐族屬能生擒殺獲本賊者命為本路土官該載不盡事理令總兵官擬議申聞施行於戲咸與惟新式布寬條而示信

自求多福勉思後效以圖功咨爾遠人體茲至意

景定五年十月丁卯詔

朕嗣守基圖君臨區寓厯四十一年內揆菲涼罔敢暇  
逸荷高穹之眷命蒙列聖之遺休洪濟艱難圖惟康乂  
歲事荐登而民生底定沴氣即弭而邊塵寢清朕方益  
勉修攘居懷儆戒積勤與豫有加無瘳乃至大漸恐不  
得負宸見羣臣皇太子溫文夙著仁孝有聞升儲副者  
五年久參裁於庶務宜自春宮而嗣服允符至道之舊

章可於樞前即皇帝位皇后佐朕躬章明坤載可尊  
為皇太后應軍國事務並聽皇帝處分爾其式遵成憲  
誕受多方益奉母儀恪遵慈訓皇帝成服三日聽政喪  
紀以日易月羣臣共為寬釋勿過摧傷百官入臨並隨  
地之宜諸道州府長吏以下三日釋服在京禁音樂百  
日在外一月無禁祀祠嫁娶緣邊不用舉哀山陵制度  
務從儉約應中外諸軍支賜及其他不在詔中者並聽  
皇帝處分於戲人羨久生奈盈虛之有數天惟純佑緊

付託之得人更賴股肱之元臣文武列辟交修不逮協贊不平咨爾羣倫體予至意

求言詔

朕荷列聖之儲休膺先皇之傳祚顧惟菲質獲纘丕圖燭理昧而何以周知羣情更事淺而何以裁成庶務繼猶判渙其如多難之未堪不遑康寧永惟萬事之有闕肆初臨聽合廣咨詢天難忱斯孰為迂續之本民亦勞止孰為綏靖之方上而朕躬之愆違次而朝政之得失

外則邊陲之利害下而田里之戚休惟言路之宏開為  
新政之急務用求忠謹期底救寧若昔大猷蓋有闢門  
之典閔予小子敢忘謀廟之詩言而可行則匪徒容納  
試之既效則宜示寵嘉悉意以陳爾無悼於後害虛心  
而聽朕方佇於嘉謨咨爾多方體予至意

賜侍讀侍講說書官詔

朕以菲質夙承義方先皇帝貽厥孫謀莫詳資善之一  
記予小子茲迪彛教俾親博雅之羣儒勉奉遺謨初承



大統感疇昔之問安視膳予惟見於墻見於羹矧今日  
之發政施仁且欲觀其志觀其行儻非講學何以紹圖  
王人求多聞必精研於古訓天下治在道宜深究於理  
源惟對賢士大夫之時常多則於古先帝王之道有得  
由堯舜禹湯而汲汲猶恐失之論唐虞仁聖以訢訢我  
自樂此肆因初服首闢經帷既登進於舊游且旁延於  
時望惟端平親政讀衍義之成書惟景祐盛時陳正說  
之不訓稽累朝謨烈之懿暨七篇仁義之陳六經之道

與同歸百世俟聖而不惑自求自趣開予以厭飫優柔  
所知所行迪我於高明光大銳期磋切周廣緝熙庶君  
德之日強則治功之益進予其自勉爾尚交修

賜先朝故老大臣詔

朕纂承先帝之丕圖注想朝廷之故老天下大器念付  
託之惟艱舊德元龜方咨諏之是急睠言勛輔式燕殊  
庭曩屬時艱屢膺事柄入則謀謨廊廟出則控馭邊陲  
中國四夷每想聞其風采元侯宿將嘗稟聽其指呼豈

惟朝廷之周知蓋亦帷籌之熟講凡修攘之大政有老  
成之遠謀惟天全付予有家欲恢先緒乃心罔不在王  
室宜罄忠猷

獎諭李庭芝詔

王公設險以守封疆哲夫成城是資智策睠言淮左有  
若滁陽自五代之際迄百年以來雖人民城郭之或非  
尚陵阿泉池之不改藝祖肇基王迹所紀戎功先皇敷  
遺後人欲固吾國有嘉閭制能體廟謨百堵皆興不愆

于素五月而畢迄漬于成比峻壑之憑陵望崇墉而却走周平獵狁必先朔方之城唐備西陲允藉臨涇之築本元戎之碩畫暨羣下以同心忭圖具諗於成勞亟詔用申於獎歎昔先王受命既復宏規于前人圖功益恢遠略

獎諭御前諸軍都統制利州路安撫使知興元府吳拱詔

省四川宣撫司奏卿發卒助修興元府渠堰宣力最多

歲有豐凶在天時而難必地無肥瘠顧人力之何如惟水利之能修則金穰之可望乃眷西南之境昔稱下上之田繫爾先臣暨而叔父皆以繼武整軍之暇不忘務農重穀之心卿既踐世官仍遵家法率萬兵而省徭役繕六堰而固隄防穿鄭白之渠在今奚愧通褒斜之漕異彼徒勞閱奏載嘉注懷彌厚

獎諭安南國太國王陳日熈詔

國永存而及裔嘗申帶礪之盟父教忠以事君益謹梯

航之貢睦言外屏夙奉中朝伯成之辭諸侯視如脫屣  
龍頷之隨父爵荷乃析薪有嘉高蹈之風爰錫褒崇之  
典無替厥服荐覽囊封不懈益虔復來琛獻益修方之  
再至知慕義之一忱予懷慎德之規不寶遠物爾有成  
享之節敬識多儀茲下璽書特頒金幣永惟恭順益用  
嘆嗟

又獎諭安南國太國王陳日熉詔

藩服輸忱家庭授政言惟作命嘗進爵以示褒史不絕

書乃修方之彌謹用循賜式以示恩徽

獎諭安南國王陳威晃詔

朕修和有夏惠顧南邦開國承家美肯播肯堂之績尊  
君親上嘉來王來享之儀比錫命於節旄俾紹封於茅  
土邈是鯨波之迴隔曷為象譯之再勤式彰拱極之忱  
誕致充庭之貢載循恭順良用歎嘉惟時成周蓋未遑  
於饗質迪我高后亦酌取於獻程頒金幣以言還錫璽  
書而用勸柔遠能邇朕益廣於綏懷資父事君爾彌堅

於忠孝

賜皇叔太師武康軍節度使判大宗正事嗣榮  
王辭免以充山陵禮儀使照典故兼中書令加  
食封恩命不允詔

丕惟叔父祗事先皇卜遠有期慎終為大追念同生之  
愛恪奉欽儀協酬罔極之恩用端使範宣勤備至已事  
而竣爰議䟽榮可輕論報虔致東朝之命進兼中令之  
尊蓋國朝登拜於親賢在今日講行於典故阜陵秀邸



之後未舉彛章祥符天禧以前率多故事顧如譙志乃  
控撫詞父黨無容敢仰勤於冲遜母命惟謹願俯鑒於  
懇忱所辭宜不允

賜太傅右丞相兼樞密使魏國公賈似道辭免  
以理宗皇帝祔廟已畢照典故轉官恩命不允  
詔

祇奉真游妥靈清廟神鶚安坐對越在天孝思永言涕  
零如雨昔勤辨護今相肅雖維昭考不顯亦臨在冲人

無德不報渙汗其號方隆維石之瞻謙尊而光洵覽循  
墻之疏曷煩重請祇恨難酬所辭宜不允

賜賈似道辭免兼監修國史日厯提舉編修玉  
牒提舉國史實錄院提舉編修經武要畧不允  
詔

位冢宰正百官載圖宅揆總羣書奏七畧乃屬提綱無  
廢前勞迄成鉅典矧予初服祇適先皇食見於羹坐見  
於墻盡循堯道大書之策小書之簡丕顯文謨必有房

喬領史務以監修必有魏相奉故事而條奏于以舉宏  
綱而撮機要于以揚鴻烈而章緝熙作唐一經第付諸  
儒之潤色建周六典備煩上相之持衡亟賴綜裁毋勤  
譙遜所辭宜不允

葉夢鼎辭免簽書樞密院事不允詔

明堂宣皇風曷底受釐之盛斗樞經天緯允由基命之  
嚴爰自僉同俾專贊貳卿謀猶廊廟密勿樞機綏我思  
成極天地神明之察相予肆祀殫臣鄰陪輔之勤適觀

厥成乃進厥位是特唯阿之相告亦何辭受之足云民  
宇攸寧邊兵尚宿既盡我將之饗益恢常武之規其蠲  
撫章以承眷意所辭宜不允

賜銀青光祿大夫葉夢鼎辭免除資政殿學士  
知慶元府沿海制置使恩命不允詔

初就穆陵促還近輔昔者辭以疾不能造朝今予祇命  
公爰分居里睦言古鄮實邇天台有雞犬之聞地無改  
闢靡鯨鯢之戮海不揚波公輔偃藩京師蒙福何其濡

滯方復懇辭殊拂眷懷未悉雅志會且歸矣無牽松菊  
之猶存卧而治之迄鎮滄波之浩蕩式遵眷意用展明  
謨所辭宜不允

賜銀青光祿大夫參知政事葉夢鼎上劄子乞  
朝假訪醫不允詔

園陵祗役政地宣勤執鍾九颺既畢送終之事迴車再  
宿遽騰引疾之章得非犯畢陌之埃塵抑或冒征途之  
風露會言近止庶可序情閔勞企予望之猶冀陳力就

列如云與告則匪欲聞寅奉皇輿將反虞而祔於廟載  
瞻行闕必無歸而造於朝所請宜不允

謝方叔辭職不允詔

朕嗣先人宅丕后茲廟謨之云初惟大臣慮四方在里  
居而何間睠言舊弼光輔慈皇厯筭周思嘗贊萬幾之  
務超覽淵識洞明庶事之源昉此聽臨用申咨憲安石  
之志雖不渝於東山子牟之心豈遽忘於魏闕毋云謝  
事不我告猷所辭宜不允

楊棟辭免同知樞密院事兼權參知政事不允

詔

朕迪遵彝典寅祀總章天日清明豈朕德致感通之效  
夙夜宥密伊臣鄰殫寅亮之功晉翊鴻樞仍參大政匪  
直酬庸於使範蓋將加重於本兵安事撝章歷陳歸志  
履信思順朕方克享於帝心惡滿好謙卿乃欲循於天  
道豈熙事之告備忘遠猷之是經文武兼資式徯萬邦  
之憲君臣相勅盍圖千載之安所辭宜不允

楊棟辭免進書轉官不允詔

朕臨政願治惟日有萬幾而必勤立武足兵豈天生五材而能去是以信史有表年之記善經存輯畧之文詒厥子孫布在方策以卿耆彥為朕提綱雖資儒館之編摩實賴政塗之舉要作今上本紀固將藏名山而副京師佐周室中興良已嘉車攻而采吉日遂差穀旦迄奏華編使範肅而儀罔愆鉅典成而文足證稽唐虞盛際無慙上古之書得齊魯大臣有異叔孫之禮其膺顯秩



靡事撓章所辭宜不允

洪勲辭免權兵部尚書恩命不允詔

朕念爾先人助予初政贊陳兵事老謀若蒼龜之明軾  
長禁林英詞如河漢之麗人鑑之亡遠矣家笏之在依  
然惟我有臣克庸濟美卿懿文承考風烈踐猷升堂而  
聞正音獲聆雅頌入國而望喬木尚有典刑比自閩陬  
再還禁路荐班掌武仍直摛文久此佩囊晉之曳履周  
官大司馬之政無競維人端平小元祐之風不顯亦世

益肩遠畧奚事撓章所請宜不允

洪勲乞祠不允詔

朕惟端平親政之初庶幾元祐得人之盛繁爾顯考日陳嘉謨嘗嘆魏徵之遽亡殊喜臧孫之有後於是卿以淵源之學仍擢科級以典麗之筆嗣掌絲綸豈惟克家端且華國而況入從出藩而踐馭久表夷裏粹而望實孚星履納言屢甄勸誦甫藉多聞之益曷興厭直之思遽覽來章未悉雅志爾念先人之緒業既踐世官朕於

更化之忠賢每懷舊德勉安厥位益告爾猷所請宜不  
允

包恢免除權刑部尚書恩命不允詔

朕元旦眡朝思皇多士發德音下明詔方於俊乂以旁  
招無老成有典刑何況耆英之在服卿侍言帝幕帥屬  
春官雖屢請致為臣而歸每申以不得謝之詔載稽仁  
祖之世有若臣拯其人絕故人干請之書見稱峭直杖  
京府受賕之吏猶謂平寬卿之云為豈其苗裔淵源所

漸遠矣風采殆且過之昔貳儀曹儒者守禮今長憲部  
哲人惟刑舉陶克明孰謂理官非三后之列蘇公式敬  
能使周家綿八百之基往布好生之仁體吾春朝之命  
尚何以遜為所辭宜不允

賜少保觀文殿大學士充醴泉觀使冀國公趙  
葵上表辭免乞致仕不允詔

朕惟繼體守文之君必詢黃髮而咨故實年耆德明之  
佐雖無壯事而有老謀卿出入三朝儀刑列辟師尚父

九十而秉鉞張昭所以見屈於吳人衛武公百年而作箴申公所以受責于楚相方將任事未始引年矧今極衣繡之榮奚必羨懸車之樂若不得謝具在禮經克壯其猷無慚詩雅宜蠲撝疏式體眷懷所請宜不允

賜少傅觀文殿大學士充醴泉觀使冀國公趙葵乞守本官致仕不允詔

卿早擅威名晚推肅乂年耆德邵方升亞傅之聯名遂功成欲致大夫之事載披來疏具諗高風顧方雍容燕

居自樂午橋之鍾鼓何必慷慨陳誼欲挂神武之衣冠  
客憲方勤懇情難徇所請宜不允

牟子才辭免兼給事中不允詔

朕顧瞻獻納之臣綽著老成之望學士大手筆甫用舊  
人儒者給事中復出新命以卿蚤持剛直夙嘗忠嘉平  
居恂恂在嚴徐之列臨事蹇蹇有袁李之風紀綱之司  
封駁攸賴予違汝弼宜無憚於塗歸朕心乃知蓋樂聞  
於糾正奚遜厥職尚勉乃猷所辭宜不允

牟子才辭免除禮部尚書不允詔

祀明堂宣皇風屬嚴大禮刺六經作王制允屬耆儒時  
命有申乃進其等卿以華皓再儀禁塗措之乎嚴徐侍  
從之間魁然有齊魯大臣之望齊明盛服正立執綏卿  
無媿供王祈永命之忱朕庶幾籲俊尊上帝之意然則  
太常伯之陟何事正考父之共往哉汝諧朕命不易所  
辭宜不允

王爚辭免召赴不允詔

朕當元日會漢京之朝感昔人發晉樽之意興懷碩望  
近隔濤江爰出特招起之泉石正徯賈生之前席忽聞  
考父之循墻王言出如綸令弗惟反君命不俟駕禮有  
宜然盍歸乎來遐不謂矣所辭宜不允

呂文德辭免寧武保康軍節度使仍舊職恩命  
不允詔

惟我國家之典最崇將帥之勲出爵酬勞無越六旄之  
貴有功進律尤隆雙節之榮肆考紹興厥有成憲歲序



再遷勤勞備至光世所以被優恩連推巨敵繼上殊勲  
吳玠所以承異寵卿以古名將之畧為吾良邊陲之臣  
荆楚為西門式倚金城之固岷峨橫太白重清玉壘之  
昏懋爾多庸華之魚鎮茲為曠典宜體至懷暨覽奏陳  
尚形遜避上書不自伐卿誠高漢將之風出令必惟行  
朕則有周官之制所乞宜不允

朱熠乞歸田里不允詔

朕調牧守將令潤九里以及京師卿為邇臣益嘗間兩

社而輔公室維今吳郡視古右扶起為股肱之良任我  
蕃宣之寄昔羣鴻集澤未免由已之饑今九危登場可  
以與民同樂得非政平訟理所以時和歲豐不絀不競  
而宜人則予以懌何嫌何疑而謝病匪我攸聞為民少  
留姑徇潁川願借之志勿藥有喜無起彭澤賦歸之懷  
有不如章難乎從欲所請宜不允

江萬里再辭免除資政不允詔

朕畀矜閩部遘困民難申錫重臣俾仍牧守豈直少旌

於治理蓋將嗣課於康功荐覽來章力辭成渙大夫求  
牧何乃欲反諸人歟赤子阻饑忍不得乳其母也宜承  
初詔母事再陳

林存辭免知潭州湖南安撫使恩命不允詔

南楚上游星沙重地一襦五袴所貴選侯大纛高牙尤  
嚴置帥以卿詞華哲匠政路舊人粵予解瑟而更張屢  
俾剖符而出守紆東嘉之綬既留召舍之詠思辭建安  
之麾難免魏藩之息偃起之衡泌鎮我湖湘雖園林勝

事鐘鼓清時爾何心於岳牧然庭戶令行湖山民樂吾  
重倚於翰維宜蠲撓章亟承眷意所辭宜不允

李庭芝乞亟俾追服不允詔

中國之勢無競維人人臣之義無以有已念卿往年之  
受任蓋沿古誼以奪情護兩道之風寒底四郊之日靖  
蕃宣是力眷倚方深夫既以義斷恩則必謹終如始政  
使冠衣畢制曷紓三年過隙之餘哀寧如樽俎折衝可  
立千古不磨之偉績勉就明揚之孝將酬敵愾之庸所

請宜不允

姚希得乞歸不允詔

卿二年制閫一意公家知無不為迨天之未陰雨事乃有備如人之護風寒式資允文允武之才兼任足食足兵之寄師屯聯絡天塹尊安有穡人之成功無疆吏之來告眷懷績用良所歎嘉胡為抗章遽欲解組念河水之未合正吾先時預防之秋俾江水兮安流豈卿計考求去之日無怠爾事勉為朕留所請宜不允

馬光祖辭免除沿江制置大使兼江東安撫知  
建康府行宮留守不允詔

惟今江閩內護留都每輟將相大臣往任保釐重寄卿  
碩膚厚德典刑宿儒其威名荐著於鎮臨其惠澤素覃  
於牧守茲謀元帥無踰老臣昔黃霸潁川前後八年而  
愈治郭伋并部兒童數百以來迎成命既頒俾民大悅  
人惟求舊初何疑於重臨事不辭難亦胡為而多遜所  
請宜不允

高達乞祠不允詔

朕思固封陞責成帥守重湖之北正倚中權夷陵以西  
復資遠畧是乃安邊立功名之地未當闔門養威重之  
時遽諗祈閒詎容從請太白出高敢戰者古况屬盛秋  
匈奴未滅何以家為益肩壯志

賜皇太子生日詔

陽居大夏允屬嘉辰震為長男欣逢初度承邦家之積  
慶綿宗社之丕基日就月將溫文以懌星暉海潤純嘏

爾常茲爰舉於彝章乃誕頒於賜式祇膺茲眷用屆壽祺

賜皇弟生日詔

少皞帝之仲秋時登穡寶孟侯弟之初度慶輯杖華位極師垣勢隆宗翰式相好矣肆頒臺餽之彝禮亦宜之用致門弧之喜永綏壽嘏庸對眷懷

賜葉夢鼎生日詔

月維建戌時屬生申弧矢以射四方有華在戶帷幄之



策千里密借前籌往續修齡是頒彝式體貌有加於近  
輔載錫之光精神宜折於遐衝俾耆而艾

又賜葉夢鼎生日詔

月紀肅霜近金行之弭節星垂大昴參玉鉉以贊元慶  
屬門弧寵加臺餽式燕且喜其茂對於眷懷俾壽而昌  
以共扶於昌運



欽定四庫全書

碧梧玩芳集卷三

宋 馬廷鸞 撰

赦文

皇帝登寶位赦文首尾詞

門下帝王統羣生實任撫綏之寄春秋正五始况承付  
託之初仰惟先皇丕昭前烈繼序十有三聖光紹寧宗  
享國四十一年遠幾仁祖視民若保事帝如臨以江海  
之量優容羣言以雨露之恩滲漉九有時和屢格敵難

坐消日引月長久於其道蚤朝晏罷適求厥寧聖躬莫  
憚于焦勞冲候遂愆于節適興言菲質恭侍宸庭解帶  
靡遑所期日間抱弓何及詎意天摧驚聞憑几之言俾  
奉纘圖之重恪承慈極勤撫多方創鉅痛深且嫫嫫而  
在疚投艱遺大尤栗栗以弗勝惟天地之德好生惟祖  
宗以仁立國矧屬君臨之初政式循覃沛之舊章可大赦  
天下於戲天付有家傳在予必稽謀而疾敬德父有天  
下歸于子惟永念而弗棄基庶能慰六軍萬姓之同心

于以答中國四夷之望治尚賴忠賢碩輔文武具僚協濟康功共扶休運布告中外咸使聞知

德音

烈文仁武聖明安孝皇帝祔廟德音

門下朕永言孝思以當大事於乎皇考維繼序之不忘  
瞻彼昊天欲酬恩而罔極喪飾三年之紀葬遵七月之  
彝龜筮告期龍恍即路天維顯相胥江之波濤不興民  
靡告勞會稽之人徒畢集甫臨真域式迄羨封八翼五

重必誠必信千秋萬歲既固既安吉仗迴虞新宮登祔  
嗟嫫嫫在疚之日賴蹇蹇匪躬之臣三公在朝力請嚴  
儀之辦護百官承事咸遵命戒之驅馳念雖循儉約之  
訓言顧寧免繹騷之煩費敢塗載啟京師同陟岵之悲  
窀穸孔嚴近輔奉因山之役輸勤惟謹趨事敢稽井賦  
縲囚悉從寬宥岳祇瀆祀咸與封崇亟敷湯網之寬少  
慰堯牆之見時為舊典匪我私恩於戲唐宗葬近橋陵  
未忘孝敬漢帝魂思沛邑尚議復除知予仰體于遺仁

咨爾具敷于德意

制

皇太子妃全氏立為皇后制

門下王位在德元所以接千歲之統后職聽內治所以  
形四方之風朕肇總乾綱儀圖坤載文王為世子問安  
嘗共至於寢門太姒嗣徽音思媚益仰承於京室稟奉  
慈闈之命延登中壺之賢涓選剛辰誕揚渙號某氏冲  
嘉而淑茂懿敏而靜專居勤圖史之遵動中環佩之節

仰惟聖父謹擇儲妃興懷慈憲之家我之所自出爰得  
元良之配因不失其親褱綸粲入覲之儀衿帨盛來賓  
之禮天作之合人無間言而能謙必自將柔恭有恪寒  
溫親旨甘之適夙夜期儆戒之成漢觀錫名鍾在太孫  
之愛唐宮臨澡增益慈皇之歡朕丕紹帝圖敬敷民則  
怡怡愉愉而奉太后茲惟卽阼之初雖雖肅肅而惠宗  
公端屬御家之始矧明揚於親訓仍申諭於眇躬謂子  
事母婦事姑既無違禮男正外女正內當舉上儀加重



翟以玉笄範盤螭而金璽式遵隆指茂建鴻名於戲朕  
承長樂之顏后則佐餞於東內朕奉清廟之祀后則親  
蠶於北郊關雎有正始之基葛覃為節用之本順陰陽  
之義則家理侔天地之行則物宜胥示化原永綏福履  
可

與芮特授中書令制

門下朕丕惟叔父追仰先皇兄弟孔懷素篤同生之愛  
禮儀既備茂宣往送之勤穆陵屆竣事之期慈極促報

功之典欲酬使範宜峻朝章襄德第勞邦彛未之有改  
先意承志親命不得而違式隆專席之榮具諗垂紳之  
聽具官某躬全明德地極茂親一體先朝符開元羽翼  
之頌示儀宗室陶周南信厚之風藩衛尊強磐維鞏固  
迪維冲子克紹慶基文帝應大橫初協纘圖之兆元王  
為季父實依秉德之陪瞻望軒臺肇營禹會永言孝思  
孝思維則何勝陟岵之悲因心則友則友其兄恪赴在  
原之急念昔歡承於棣萼乃今愴奉於菽塗反也如疑

遽不陵節龍輜鳳翥初就因山之形玉座黃陵載迄羨  
封之役其儀不忒而哀有餘若稽秀邸之親賢克奉阜  
陵之襄事嘗以紫微令之重兼為大父行之華蓋雖天  
下之達尊勿替先王之敬典增隆巖石申衍圭畬惟三  
省長官之罕除蓋中興百年而再見夙稱華重允極褒  
崇於戲同姓之國五十三周尊康叔中書之考二十四  
唐重汾陽邦家有榮古今鮮儷願膺茂渥永介繁禧可  
與芮特授武康寧江軍節度使依前太師判大

宗正事嗣榮王加食邑實封制

門下朕初紹丕圖恪遵慈訓棠棣孔懷之愛仰體先皇  
行葦內睦之仁孰加叔父撫紹熙一時之令典有憲靖  
雙節之殊褒友則因心昔未酬於素志言猶在耳今爰  
屬於眇躬如對咫尺顏用孚羣聽具官某暉聯皇極德重  
宗磐元王帝弟之最尊多閱義理河間宗室之大雅獨  
備溫仁厚叙親賢時維昭考聳民瞻之赫赫莫重建旄  
訓公族之振振有華襲爵式相好矣禮亦宜之粵予宅

恤之初追感盡倫之義求而弗得望而弗至惡乎用情  
敬其所尊愛其所親庶幾達孝况承治命具有舊章是  
用端策涓辰揚庭渙號衮衣赤舄仍冠公槐壽甲琯戈  
加崇將鉞舊組不移於洋水新麾增煥於雲安順考邦  
彛三公進魚兩鎮特優宗老累朝曾不數人併衍爰田  
申陪真食敢云馭貴惟以篤親於戲稽漢制之魚郡連  
城用彰殊禮慨唐宗之大衾長枕能不愴懷式介蕃釐  
以綏茂渥可

賜告口宣

有勅統紹先皇恪承遺訓行尊叔父式茂殊褒兼兩鎮  
以升華肅羣工而誕告對揚前烈祇服明綰

與懌特授保寧軍節度使制

門下朕丕承聖緒厚睦天枝封同姓以旂式嚴周典建  
諸王為輔益廣漢恩眷言秀邸之宗英上系昌陵之祚  
嗣仁先篤近愛必惟親况資厯之既深孰褒揚之可後  
登于齋鉞渙以明綸具官某德度粹夷才猷膚敏高陽

苗裔紛其有此修能河間詩書卓爾近乎大雅頃繇帝  
胄服在官聯立朝推中壘之簡庶事上極汝陽之謹潔  
黔水之民康又浙河之使光華已躋郎秩之榮斯陟戎  
班之峻留朝列邸又閱再朞朕鑒在角弓庇懷葛藟厥  
有彝憲以旌九族之親豈無他人難比諸姬之近特加  
異數固匪私恩是用輟自承流寵之植屏十連為帥超  
居上將之元百世不遷永謐大宗之祀優游壽館衍拓  
真畬於戲人道尊祖故敬宗天道好謙而惡滿親之欲

貴有如爾祖憲靖之賢高而不危尚服先朝淳熙之訓  
肅聽朕教追孝文人可

賈似道依前太傅右丞相兼樞密使加食邑制  
門下朕祇適寧考率由舊章惟王發政施仁續周家忠  
厚之脉命相布德和令輯漢書寬大之文董時官修繫  
我宰輔裁成義類等百世莫之能違謙避恩徽以三公  
不易其介肆陪井賦敷錫渙綸具官某宏材周事物之  
幾微粹學洞古今之源委讀書不讀律欲致君於堯舜



之隆治法與治人常慨世於周秦之敝以勤勞穆天緯  
以公恕秉國鈞四方既平念昔搶攘而非甚有紀百度  
維正及今閒暇而屢省乃成禁罔闊則寧漏於吞舟經  
制定則靡容於亡楫謂魚麗法度缺矣不幾小雅之盡  
隳若行葦福祿成焉蓋本我家之世積信令皎如日月  
寬條沛若江河上紀先朝式至今日乃光烈考聖謨洋  
而嘉言彰予臨兆民歷年多而施澤久前為律後為令  
小作紀大作綱洽民心而不犯有司式顯有虞氏好生

之德宣主恩而建立明制是資仲山甫將明之材總齊  
悉上於羣書褒賞宜申於絕席一成而不變既昭昭象  
魏之垂三命茲益共顧懇懇師垣之避凜莫踰于素守  
姑申衍於真禽庶幾表大臣興謙崇遜之風可以厲人  
心立經陳紀之外於戲六典之建為民極爾尚式時周  
公一夫不獲曰予辜時則有若伊尹勉摠素學儷美古  
人翳我宗工奚煩多訓可

口宣

卿寅亮天工綜裁邦憲維師避寵姑曲徇於一謙成渙  
疏恩茲申陪於多井祇承茂眷永翊丕基

同知樞密院事葉夢鼎除參知政事制

朕以眇質初紹鴻基天全付有家孰堪多難王圖任共  
政無若舊人久協贊于機籌宜晉陪於宰籍式彰枋用  
乃播綸言具官某識洞萬幾道該衆妙簡知聖考貽厥  
燕謀初建儲闡訓于舊學屬抱遺弓之痛具宣奉瑁之  
勤佐佑冲人罔負先皇之顧託鎮定大事欲紹前哲之

聲猷終仰丕成以光初政稽用師言之錫聿參台路之  
元永建乃家藉垣墉之保以輔台德資羽翼之良朝有  
老成國其康乂噫堯在萬世孰能慰羹牆之思舜欽四  
隣其必賴股肱之助顧惟宿望奚俟多辭可

簽書樞密院事姚希得除同知兼參政制

朕未有艾率昭考以繼猶王用丕欽圖舊人而共政晉  
貳三軍五兵之本併參一日萬幾之繁乃播綸言式彰  
枋用具官某德全方大望著顯卽參帷幄之謀先帝早

加於大用偉衣冠之侍冲人尚及於從游悵杞國之悲  
摧悼周家之降割敬保元子克酬弘濟之言敷求哲人  
不負維艱之託迪惟初服式仰丕成邊尚宿師朝方莅  
政徹彼桑土孰先事以綢繆莫予荈蜂疇後患之懲必  
宜資賢老周緝化幾臣人顯哉必嘉謀嘉猷之入告孺  
子王矣惟立政立事以自今可

太常少卿湯漢特授起居郎兼職仍舊制

朕初承基緒渴想典刑戲言出於思立之史佚舊學遜

於野顯乃甘盤具官某造詣宏深操守純固慷慨望古  
志獨得於幽尋博雅通今道固期於兼善昔予幼學夙  
得良師首陪翊善之講明繼造承華而衛翼起商芝之  
隱久矣從游却齊蒿之邪引之當道茲予臨莅遲汝歸  
來動則左史書必纂言於玉陛學為王者事尚卒業於  
金華細聽嘉猷以裨初政可

守太府卿兼國史史季溫特授起居郎制

朕光履基圖樂親耆艾武帝問治道蒲輪甫起於申公

成王無戲言桐葉豈書於史佚登而鴻碩立我螭階具  
官某蚤以蜀珍見推國器越在外服既茂著于嘉庸立  
乎本朝亦峻登於顯序山林獨往松栢後彫粵予纂紹  
之新還爾班行之舊可使耆老大夫之久次實為典刑  
宿士之超遷天子有史官密賴繩愆而糾繆春秋書大  
事庶幾廣記而備言毋憚直前是為報上可

朝請郎守御史朱貌孫持授右諫議大夫制

朕纂紹基圖恢張言路採蘇軾封章之語以厲憲臣有

陽城伏閣之風斯為諫長甫頒親筆亟下除書具官某  
正論回天忠氣貫日粵受知於穆考俾重列于繁官詰  
當道之豺臺綱甚聳灌託社之鼠宮省為清本聖主之  
可為忠言亦直臣之不畏強禦昉新臨聽式廣咨詢聞  
門達聰方導人而使諫明目張膽豈有責而不言惟諫  
省虛常侍以弗除故上坡自雜端而徑陟內箴王闕外  
倣官邪爾乃慎則有嘉謀其惟入告予其懲而毖後患  
無使拚飛可




朱應元除右正言兼侍講制

法筵第一義已高攀檻之風諍臣有七人亟晉伏蒲之  
選允為異擢匪直序遷爾篤實恢閎剛方沉毅對仗蚤  
聞於獨擊時論翕歸乘驄更喜於重來風稜愈勁奚獨  
烏臺之振職徑從騎省以升班輸禁闥之忠有猷則告  
侍細氈之講非道不陳汝宜戒於面從朕方引以自近  
事聖君者無諫奚取荀卿之言惟大人能格非盡體孟  
軻之訓愈增諒節益簡清衷可

梁椿選除右正言兼侍講制

察事行馬外蚤聞對仗之彈拜疏延英門聳觀伏閣之  
諍蓋欲措朕躬無過之地是必資天下敢言之人以爾  
秉心端夷植學醇正昔褰裳以去良由魑魅嘯凶之時  
迨莪冠而來竟行獬豸觸邪之事首除貪濁務戢奸回  
不為御史必為諫官蓋酬夙望今之小坡古之遺補匪  
直序遷仍晉侍於細旣靡憚攀於折檻名將留遠職在  
格非今得正人豈待著諍臣之論後有良史當續書諫

苑之篇可





欽定四庫全書

集部

碧梧玩芳集卷

四至六

詳校官庶吉士

臣張溥

主事

臣呂雲棟覆勘

謄錄監生

臣俞光豫

謄錄監生

臣劉

培

欽定四庫全書

碧梧玩芳集卷四

宋 馬廷鸞 撰

制

留夢炎除吏部右侍郎兼職仍舊制

朕疇咨魁望綜叙右銓王者必有史官久付春秋之筆  
削天官其貳小宰爰資朝夕之論思具官某方厚凝猷  
中和植性洛陽之條政事諸老生未能言潁川之對天  
人子大夫褒為首直聲夙颺於表著嘉績茂鬯於節麾

韓琦於職事甚勤可占遠器王旦謂榮進素定豈有競  
心蹈九關之虎以逢尤翔千仞之鳳而高舉暨解弦而  
號召復攬轡以驅馳賁然來思亦集爰止朕所親擢蚤  
已冠臯伊之徒汝獨徐趨亦合造嚴吾之列併演西垣  
之綸綍仍陪東禁之衣冠噫吏奸如山以一切之法而  
舞弊官曹積水惟三班之地為滯材藉汝清勤副予簡  
拔可

殿中侍御史兼侍講陳宗禮特授權吏部侍郎

兼國子祭酒制

朕招徠正人措施初政知無不言言無不盡大明風憲  
之紀綱德鈞以才才鈞以勞徑付天官之衡尺少旌直  
節彌企嘉猷具官某澄之益清澹如自守訪予落止欲  
聞徃行前言國有人焉是在法家拂士奏書如湍水之  
赴壑重朝若猛獸之在山嘉其不阿引以自近人物各  
為目山濤雅善於題才學者必有師韓愈深宜於祭酒  
密勿燕閒之侍從容鴻碩之咨噫禁路獻納論思况親



廣厦賢關興禮崇化又播新畬勉汝交修對予妙簡可  
趙與可除金部員外郎制

國家錢穀出入典以民曹財貨本末源流詳於珍部與  
其用新進之才而試以煩劇孰若酬已試之效而還之  
班聯爾綽著才能夙稱宗雋更嘗既熟足以知天下之  
利源明敏而通庶幾合古人之心計渙予新渥畀爾舊  
官其檢括於簿書以參裁於輿賦深圖國計益厚民生  
朕惟節用愛人則百姓孰與不足爾念生財有道以庶

邦惟正之供可

起居郎兼權工部侍郎兼國史兼侍講李伯玉  
特授權禮部侍郎兼職如故制

朕嗣承聖緒擢拜從臣左史記言感先帝御朝之舊秩  
宗典禮際冲人嗣服之初用播絲綸以華筆橐具官某  
風猷端亮學問宏深以大對起諸生亞端平掄魁之選  
以讜論先衆俊輩元祐人物之英收膏反液而德譽愈  
隆明目張膽而直節故在昔承華之講學多所發明今

邇英之親儒尤資啟沃已攝承於事典其進貳於儀曹  
資夙夜寅清之賢在朝夕論思之地公卿幸得遭遇式  
佇建明丈夫何以假為倚需真拜有猷則告維乃之休  
可

文天祥除尚書禮部員外郎制

吾甚遴郎選尤重儒科倘以掄魁為表郎其庶矣乎爾  
藻思清新詞華敏茂榮進素定匪徒詫於高名慷慨敢  
言蓋已觀其初節擢從郡最登之郎闡夫立乎人之本

朝而培養器業以容揚光寵者必有在矣豈直百日掌  
綸言十年至兩制之謂乎大車以載務積厥中朱紱方  
來以艾爾後可

太中大夫兵部尚書兼直學士院兼修玉牒官  
兼侍讀洪勲特授通議大夫依前職制

鏤白玉之牒迄奏鉅編易黃門之階式躋顯秩宜有揚  
綸之寵以增曳履之榮具官某學深孔孟之淵源詞挾  
卿雲之河漢尚書踐台斗峻居古納言之官國朝盛文

章獨擅大手筆之作有三長譽成一家言予懷帝籍之  
登閱爾率儒紳而纂輯大事書之策遙觀厥成衆美效  
之君煥焉可述序進其等式遵乃彞噫偉績編詩書視  
六經而無媿大夫掌論議增一秩以何辭既好爵之爾  
縻尚嘉猷之我告可

姚希得除兵部尚書兼侍讀制

嘉元戎十乘之績自鎬來歸正司馬九伐之權于周受  
命非時雋望昌副僉俞具官某機猷碩膚風槩方整儒

宗堂堂不撓尚于中行介臣休休有容可以大受繫汝  
入從出藩之久助予內修外攘之規平淮而韓愈在行  
迄奏鵝池之捷表海而呂望賜履載澄鯨浸之波輟爾  
論思付之居守兩都相望坐底江淮之晏清三年而歸  
宜副公卿之選表列在五兵之長還其八座之尊仍侍  
經惟有華從橐噫必求諸道其惟講甄上之唐虞誰能  
去兵孰若咨禁中之頗牧有猷告后無競維人可

起居郎兼權中書舍人兼國史兼侍講湯漢特

授權兵部侍郎兼職依舊制

甘盤商之舊學肯從河毫以來歸祈父周之夏官無使  
爪牙之轉恤有華筆橐用播絲綸具官某與學造微雅  
懷經遠如玉在佩動之斯和惟木從繩粹然出正蚤逢  
昭考俾迪冲人粵予初紹於鴻圖遲汝來儀於螭陛心  
乎愛矣具聞藥石之箴言時而颺之聳聽屢甑之勸誦  
輟班記注晉列論思豈惟貳司馬掌政之聯良欲展近  
臣盡規之益外振修攘之務內殫獻納之忠五材民用

之敢忘經武一正國定矣是在格非罄汝嘉猷對予妙簡可

李芾除尚書兵部員外郎制

維我孝宗甚遴郎選非歷守刺不在選除然必以居官久治行高者為之朕之初政仰法淳熙其於用人宜守成憲以爾識高才閎資凝履勁踐駁既久績用有聞司臬京畿擢置朝序文昌諸曹皆望郎而佐兵尤為名部其贊爾長以修我戎稽名數於有司整規模於暇日爾



之任也尚往欽哉可

陳宗禮除殿中侍御史兼侍講制

朕惟言路之重輕實關初政之得失予懲後患無為并  
蜂而允桃蟲國有忠臣斯若猛獸之衛藜藿既膺妙選  
用答僉諧爾蚤列英躔寔高時望夙推鯁直見謂朝陽  
之鳴中困擠排不改歲寒之節迪惟先帝嘉獎直臣昔  
召對席前思賈生久矣今宜居禁闥如汲黯近之其執  
法於殿中復橫經於氈上以裨帝學以糾官邪增予初

服之光展爾平生之素翔而後集宜亟副於欽翹言之  
必行固無難於聽納可

朱貔孫除侍御史制

朕恢洪至道察納雅言王多吉人所重法家拂士汝長  
御史實貳大夫中丞屬方執法於殿庭爰俾提綱於臺  
院具官某學探元本體涵中和氣貌則威鳳祥麟節守  
則嚴霜烈日義方對仗連叱去凶最為有功唐介乘驛  
重來言事益無所避茲峻躋於橫榻仍密侍於細氈無

服讒菑慝之能容有讜論嘉謨而入告臺綱丕振國勢  
愈尊噫母云天下本無事之秋是乃明主納忠言之日  
他山之石可攻玉惟仁義足以沃心當道之豺不問狸  
使奸邪為之落膽邦其時又汝永有辭可

新除秘閣修撰洪天錫特授侍御史制

朕以眇躬丕膺大統元祐嗣服用劉摯居臺端隆興初  
年擢十朋長御史爰考兩朝之成憲特招先帝之直臣  
具官某學問淵深風采凝峻秋霜始擊嘗勵志於鷹鷂

歲寒後凋不改柯於松栢迪惟烈考嘉獎端良外咨禮  
樂之光華內典圖書之清重翔而後集盍歸乎來肆朕  
纂承首加號召惟初政之得失關言路之重輕今無大  
夫中丞合峻躋於橫榻古有法家拂士宜密侍於細旣  
君德緝熙朝綱肅穆唐介論事益無避於重來蘇軾陳  
言真有聞於入侍增而亮節對我寵光可

饒應龍除監察御史制

朕興起治功恢張言路惟紀綱振飭莫嚴六察之司必

中外踐敬斯妙一時之選宜求瓌望以副親除爾圭璧粹溫笙鏞純繹登畿結綬端人正士之雍容服嶺分麾小國寡民之綏撫比酬郡最擢掾樞庭與其筆經武之編摩庶有裨於廟筭孰若冠惠文而彈治以正大於臺綱噫明主可為忠言天下豈曰無事名從遠外既非呈身識面之流茂聲忠嘉無愧明目張膽之地佇聽皂囊之剴切益留青史之芬芳可

試禮部尚書兼直學士院兼給事中兼修史年

子才特授翰林學士知制誥兼職依舊制

朕追懷先帝優寵詞臣宸翰作歌冠中興之盛典鑾坡  
訪事參幕召之前規茲予履帝位之初進爾登禁林之  
長疏綸已試正席久虛具官某素履珪璋正聲韶護考  
四海而為雋道德蜀珍與三代以同風文章漢制久奏  
從官之技茲攝學士以來若涉春冰嗟予耒艾尚詢黃  
髮非爾其誰宜上詞垣仍兼瑣闥以新政之謀猷翼乃  
后臣人惟良顯哉以初元之詔書聳遠民聖主一見決

矣諒非耆德昌稱殊知噫建中聞陸贄而亟置翰林長  
慶知德裕而遂令典誥古有光於初服今惟用於舊人  
繫我宗工實惟煩浩可

龍圖閣學士王燾除端明殿學士提舉佑神觀  
兼侍讀制

朕監觀祖宗登用鴻碩升之端殿何殊元祐待蘇軾之  
規處以內祠盖用紹興起張燾之典仍晉陪於詔讀茲  
渙發於綸言具官某篤厚而靖夷端莊而儼恪國之耆

艾魁壘能通古今朝之宿儒大人可備顧問曩上星辰  
之履旋持江海之麾既紓民溝壑之憂亦遂爾山林之  
樂白駒在空谷每懷嘉客之逍遙鳴鳳於高岡常企古  
人之翔集峻班秘殿趣侍經筵無官職之閔勞殊庭容  
與有謀猷之入告重席敷陳式昭眷倚之新增重論思  
之舊噫畎畝之中樂堯舜寧如親見於君民旃屨之際  
論唐虞良欲考求於仁聖亟承簡注懋對儀圖可

陳宗禮除秘書監制



朕顧瞻周行欽遲直士宜得骨鯁魁壘之彥以備論思  
獻納之儲豈招之不來必進以其道爾科級鼎峙學殖  
淵涵澹然廉靖而寡求卓爾堅挺以有立虎豹怒九關  
之守汝既逢尤鳳凰覽千仞之輝汝方翔集茲由刺部  
促使造朝中秘萃乃英儒大蓬鄰於禁從枕書自造庶  
同居易之雍容持論不阿蓋有世南之抗烈整而召屢  
答我數綸可

王持皇除著作郎制

自我高皇帝崇重三館招延天下之英材有臣十朋實以忠言諒節來游著廷一時人物之盛後世猶可想見若爾塋者非其苗裔與學素深茂人有典刑去國累年朕每有第幾人王某之思還爾舊官以昭風烈可

吳舜龍除大理卿制

朕立政用人其惟四方之獄勿誤制刑明辟毋使天下之平一傾爰得儒流晉居卿列爾澹如自守溫其可親送以皇華咨度諏謀之既審付之丹筆淺深輕重以必

宜朕之初元法用中典茲選良士以惠嘉師恢然寬大  
之朝澤以詩書之味迪臯陶之祇叙民用不犯于有司  
積定國之陰功爾亦有辭于永世可

季鏞除大理卿制

朕肇營禹會崇建堯陵哲王在天既畢因山之奉卿士  
惟月積酬藩翰之勤爾惓惓無華廉隅有守以愿恪祇  
王事以寬易課民庸比鎮左馮助襄大事上宰劬躬而  
辨護元侯率職以馳驅縣官供億之需人徒發召之役

輸而勤勩塞我悲摧及茲竣事之餘宜舉陟明之典式  
序在位姑進長於理官有功見知蓋已鄰於禁路益肩  
猷念用答寵光可

謝堂除大理少卿制

朕法大禹卑宮之事監成周空囿之隆疇若予工豈作  
無益害有益式敬爾獄亦曰明刑期無刑肆從大匠之  
班進列理官之貳爾溫乎后家之雋卓爾相門之英悉  
其聰明勿悞臯陶之法習於厚重端有釋之之風選賢

與能豈疏踰戚母曰階庭蘭玉之秀不讀司空城旦之書下無寃民爾有令譽噫大理不列於三后夫豈成言歲中超遷至九卿要為殊渥可

湯漢除太常少卿制

東壁之有二星久映圖書之府奉常之冠九列獨高禮樂之司朕遠覽古今慨懷制作往而不反孰能還河海之工招之不來莫克致齊魯之士斯道未墜得人則興庶幾先王以俟君子爾以潔靜精微之學有廣博易良

之風文不在茲乎既總提于冊府禮為國何有宜參貳  
于容臺官修其方民用丕變致中和之理豈徒玉帛鐘  
鼓云哉立太平之基安在簿書獄訟而已蓋籩豆司存  
之事惟搢紳先生能言噫叔孫號稷嗣君朝廷之陳無  
取桓榮居太常府儲學之益為多勉爾直清之規迪我  
溫文之懿可

韓禾行司農少卿兼國史兼侍讀制

朕爰登儒臣以貳稼政兩司農傳授家法是為漢代之

經師中都官除用士人亦有皇祖之謨訓爾識中原之  
文獻接諸老之典刑師友淵源漸者遠矣詞章閎肆浩  
乎沛然自典三雍擢儀九扈學既周於體用理何間於  
精粗贊此劇繁資其通敏錢穀問出入之數莫嚴寶穡  
之司屢甄考仁聖之風宜卒金華之業可

翁合除國子祭酒制

朕崇化厲賢繼志述事掌成均之教法有祭酒之尊稱  
荀卿以古賦鳴庸俾修列大夫之闕韓愈為諸儒倡實

甚宜國子監之師爾詞源深長風節端亮奮自橋門之冠帶還為學省之範模人有典刑士咸厭服舉酒以祭用旌館下之招歷階而升宜冠堂上之席法常楊之文而草制秉遷固之筆以紬書允謂儒榮式符輿望豐水有芑是皆先王培養之餘中阿育材宜迪初元新美之化可

翁合除國子司業制

朕樂育英才有味周人之雅簡求師氏宜如陽子之流



爾密擅文聲與江漢秋陽同其皎潔中持節守非風雨  
寒暑所能變移入則望郎出為膚使不見生久每思夜  
召而席前以教人為可使晨招於館下除書之出土譽  
翕然師立則善人多足以展孔孟行世之學事久而公  
論定庶幾洗聃非同傳之羞所宜疾驅以對親渥可

韓禾除國子司業制

朕謹簡儒官涵育士類太學興而英俊得允藉作成師  
道立則善人多宜先表率爾氣醇履粹學廣聞多嘗登

乾淳諸老之門牆尚接中原文獻之緒論科為宏博昔  
取之以日光玉潔之文人重老成今用之於霜降水涸  
之後久翔省戶宜貳成均噫入館下招諸生朕既重之  
於韓愈表儒門碣遺愛爾無多遜於陽城可

陳宜中除國子錄制

先帝時崇學校以育英才重科目以延俊乂於是名公  
鉅卿偉人雅望胥此焉出爾宜中學問邃深氣節端亮  
慷慨舉幡之誼六館在其下風春容奏篇之言大庭擢

居亞選徑從幕府來糾賢關昔元祐之初學省喜於得  
佳士周頤之論師道立則多善人益展儒猷嗣有明陟  
可